

NOS TA DEN SIMAN DI CELEBRACION DI NOS DIA NACIONAL

Loke bo kier sa di Himno di Aruba

ORANJESTAD (AAN): Himno di Aruba ta "Aruba Dushi Tera", cu ta e titulo di e composicion musical cu a bira oficialmente e Himno Nacional di Aruba.

Ta danki na señores Rufo Wever q.e.p.d. y Padu Lampe, dos musico bon conoci ariba nos Isla, cu na aña 1951 a sinti e necesidad pa cuminsa conserva y promove locual ta worde considera di ta melodianan tipico di Aruba.

Cu e meta ey den mente un dia mainta na 1952 Padu a bisa Rufo cu nan mester bin ariba un iniciativa pa conhuntamente compone un pieza cual mester expresa e amor di nos pueblo Arubano y spierta e sentimento patriotico pa su Isla natal.

E mes un dia e pieza a keda cla, Aruba Dushi Tera a nace, completo cu musica y letra. Den corto tempo casi tur mucha di school tabata sa e cancion y ta cante tambe na aubade y ocasion nan oficial di Gobierno.

Poco, poco y espontaneamente otro instancia nan a cuminsa interpreta Aruba dushi Tera pa tur ocasion nan di importancia pa nos Isla. Dia 21 di januari 1976, Gobierno Insular di Aruba a instala un comicion di 6 ciudadano prominente y a

politico cu e tarea di conseha Gobierno si hasi Aruba Dushi Tera e Himno di Aruba of no. Durante un votacion secreto e comicion unanimamente a vota pa Aruba Dushi Tera ta nos Himno Nacional.

Tambe e comision a vota pa añadi un couplet mas na e Himno, cu ta elogia e cordialidad di e Pueblo di Aruba y su amor pa libertad. Dia 18 di maart aña 1976 den Wilhelmina Stadion, actualmente Guillermo Prospero Trinidad a tuma lugar e proclamacion oficial di nos Himno Nacional.

Nos Aruba Dushi Tera a rezona oficialmente interpreta pa voz di e coro juvenil bow guia di Maybeline Arendsz - Croes acompaña pa e orquesta sinfonico dirihi pa e conocido musico Sr. Joy Kock.

Na un momento asina importante y di gran significacion pa un pueblo, tabata obvio cu hopi Arubiano di gran sentimiento patriotico no por a logra suprimi nan lagrima di emocion y alegria.

Haciendo uso di e oportunidad aki COMICION 18 DI MAART kier a haci un jamada na henter nos comunidad pa celebra en grande nos dia National, hisando nos Bandera y cantando nos Himno.